

# Canto pa nos "Himno y Bandera" dedicá na "Padú del Caribe"

## ORANJESTAD

Festival "Un canto pa Nos Himno y Bandera" Diasabra awor den Club Trappers, ta wordo dedicá na sr. Juan Chabaya Lampe, "Padú del Caribe", pa su aporte hopi balioso na cultura Arubano y naturalmente tambe riba e dia aki como co-autor di e cancion componi hunto cu Rufo Wever (qepd), "Aruba Dushi Tera", cu ta reflehá amor y sentimiento patriótico como "Himno oficial di Aruba", proclamá oficialmente dia 18 di Maart 1976.

Biografia di Padú del Caribe ta largo, su aporte na cultura, tanto riba tereno musical como tereno di pintura y literatura ta grandi.

Su pormé grabacion caba a muestra su amor pa su isla natal cu "Aruba Dushi" grabá riba disco 78 RPM y despues el a graba un total di 11 longplay riba cualnan semper musica di nos folklore componi pa Padú tabata destacá.

Un di su longplaynan, el a dedicá na su gran amigo y colega musical, Rufo Wever, cu 12 composicion "Recordando a Rufo Wever", un disco cu ta laga number di Rufo Wever semper grabá den memoria di henter nos pueblo.

Padú den e era di CD cu a drenta algun aña pasá, a graba varios CD cuminsando cu e promé dedicá na hubentud di nos isla "Recuerdonan Stimá", e di dos dedicá na pueblo di aruba y Antiyas Hulandes, cu semper a duné gran sosten.

El a sigui cu CD titulá "Recuerdonan Stimá" y ta aparecé tambe riba e CD di "Concierto di Siglo", cu a cosechá exito enorme na Aruba, Corsow, Boneiro y na Hulanda.

Padú a representá Aruba dignamente na Corsow, Boneiro, Venezuela, Colombia, Puerto Rico, Republica Dominicana, Jamaica, Cuba, Merca (New York, Miami y Seattle) y na Hulanda, tanto den presentacion publico como na television. E

tabata e mihor embahador cultural cu nos isla a conocé te cu dia di awe, y a ricibí premionan grandi tanto localmente como internacionalmente, y reconocimiento den diferente pais y di diferente instancia y organizacion.

No por keda sin mencioná e "Piano di Oro" ricibí na Venezuela pa su LP "Padú del Caribe en Venezuela" y su condecoracion den "Orden di Andres Bello Segunda clase", su condecoracion ricibí di Reina Juliana como "Ridder in de Orde van Oranje Nassau" y e "Zilveren Anjer" ricibí di Prins Bernhard, e honor mas halto riba tereno cultural Hulandes.

Como Pintor tambe Padú del Caribe a participá den varios concurso y a representá Aruba tambe den Feria Mundial cu su cuadro "Typical view of Aruba", ganando medaya di brons y manera e inscripcion a mencioná: "pa su contribucion na arte di mundo".

Den otro exposicion na New York, bao Auspicio di Alcoa

Steamship Company, el a gana promé premio cu su cuadro riba "Mensahe di fruta na waf di Playa". Riba tereno di literatura Padú del Caribe a ricibí reconocimiento internacional cu su bukinan "The 3rd Element" y "Harmoniologie" y despues a publicá su promé buki riba e tema di metafisica, pero den

idioma Papiamentu, "Ciencia acercando e mundo spiritual".

Padú lo no ta presente na Festival Un canto pa Nos Himno y Bandera, ya cu e lo ta na Hulanda, pero despues cu e bolbe, lo tin un ceremonia special di reconocimiento na "Tata di nos Folklore", Padú del Caribe".

## Programa Religioso na Tele Aruba Diadomingo awor

ORANJESTAD - Apostolado Mundial di Fatima (Bluer Army) lo presentá na Tele Aruba Diadomingo awor, dia 12 di Maart pa 12'or di merdia, un programa religioso.

E programa aki yama: The Teaching of Jesus Christ, cu Fr. John Corapi SOLT, STD. Promé parti: Continuacion di Bautismo. Kende nan por ricibí Bautismo?

Tin 3 Sacramento cu seyo permanente cu ta keda riba e alma, esta Bautismo, Confirmacion y Santo Orde, cu ta un solo biaha so por ricibí nan. Pakico ta hopi importante pa batizá un baby mas pronto posibel despues di su nacemento?

Bautismo ta un Sacramento di Fé, e video aki ta importante pa mayornan, educadornan, nursenan, etc, por miré tambe padrinonan y madrinanan. Ta pidi tur hende pa sintonisá Tele Aruba pa e programa aki.

## Ganadornan di Aruba Bank su competencia di trailer



1 Kavel 68, Fam. Trimon afl. 3.000

2 Kavel 129, Elvis Angela afl. 1.500

3 Amelia Aguirre afl. 500

Pa motibo di e entusiasmo grandi cu a wordo muestra, nos lo regala mas premio. E siguiente personanan ta ganador di afl. 250 y un icejug

Kavel 223 Rudy Zievinger  
Kavel 9 Miriam Angela  
Kavel 38 Chiki Dijkhof  
Kavel 212

Nos ta suplica tur ganador pa pasa cu nan I.D. pa reclama nan premio dialuna 13 di maart 10'or na Aruba Bank den Caya G.F. Betico Croes.

Nos ta gradici tur e participantenan pa nan esfuerzo.



ARUBA BANK N.V.  
Nos experiencia, Bo beneficio